

Inzko apelira na vlasti FBiH da rješavaju ekonomsku krizu



Federacija Bosne i Hercegovine mora staviti pod kontrolu svoje troškove kako bi osigurala finansijsku stabilnost te ispunila zahtjeve Međunarodnog monetarnog fonda, rekao je danas visoki predstavnik i specijalni predstavnik EU Valentin Inzko vlastima FBiH. "Smanjenje troškova neće biti jednostavno, ali se to mora učiniti, jer nepreduzimanje nikakvih mjera može imati veoma opasne posljedice."

Na odvojenim sastancima sa predsjednicom Borjanom Krišto i njena dva zamjenika Mirsadom Kebom i Spomenkom Mičić te premijerom Nedžadom Brankovićem i njegovim zamjenicima Vjekoslavom Bevandom i Gavrilom Grahovcem, Inzko je naglasio da je potrebno posvetiti više pažnje izazovima koji se nalaze pred Bosnom i Hercegovinom kao dio procesa integracije u EU.

Svrha prošlosedmične posjete ministara vanjskih poslova Francuske, Češke Republike i Švedske bila je da se još jednom potvrdi opredijeljenost EU prema Bosni i Hercegovini. Sada politički lideri i parlamenti u BiH moraju da pokažu da mogu uraditi više u ostvarivanju napretka na programu približavanja EU u zemlji. "Ako je članstvo stvarni cilj, Bosna i Hercegovina i njeni entiteti trebaju se prilagoditi zahtjevima Evropske unije. EU neće prilagođavati svoje strukture kako to BiH odgovara", rekao je Inzko. Ustavna reforma će predstavljati neophodni dio procesa integracije u EU pošto BiH treba da ima administrativnu strukturu koja je u stanju da efikasno provede zahtjeve EU. Pored toga, ustavne odredbe u

BiH se trebaju uskladiti sa Konvencijom o zaštiti ljudskih prava i Evropskom poveljom o lokalnoj samoupravi.

Iako se većina prioriteta iz EU partnerstva odnosi na nivo BiH, neke ključne ekonomske reforme se trebaju provesti i na nivou entiteta. U tom kontekstu, Inzko je pozdravio ideju za osnivanjem Fiskalnog vijeća na nivou FBiH, sličnog onome koje je osnovano na državnom nivou, a koje bi okupilo predstavnike entiteta i kantona. "Novo vijeće treba imati ključnu ulogu u koordinaciji politika, posebno u svjetlu trenutne finansijske situacije u Federaciji."